

DARI SEBULAN KE SEBULAN

Encik Saadun Bin Haji Zubir, Ketua

Pemuda UMNO Malaya, dikatakan berkata bahawa parti-parti lain seperti PAS, Parti Negara dan Parti Rakyat adalah “pelisit” belaka. Jadi menurut Saadun, boleh dikatakan bahawa tidak mustahak ada parti-parti lain lagi sebab kalau ada parti-parti lain maka yang demikian buruk sahaja adanya. Hanya UMNO sahajakah yang baik? Tanya sebahagian orang. Encik Saadun mesti ingat bahawa masanya sekarang orang tidak suka lagi mahu mendengar kata-kata yang ribut-ribut itu dengan begitu sahaja dengan tidak diberi bukti-buktii atau kenyataan-kenyataan yang tepat. Kalau lah caranya begini maka sudah tentu nanti akan ditinggalkan kapal terbang. Maka itu mustahak Encik Saadun jangan ikut perkara yang demikian-fikir-fikir dahulu sebelum bercakap.

Mohammad Natsir, ketua umum Masyumi di dalam ucapannya di kongres “Persis” di antara lain-lain mengatakan: “Bahawa Islam yang mampu membangkitkan kekuatan bagi umat Islam ialah Islam yang berpunca kepada al-Qur'an dan al-Sunnah bersih dari kepercayaan dan amal-amal yang tidak dibenarkan oleh al-Qur'an dan al-sunnah”, ia mengatakan, bahawa mengembalikan kepercayaan akhlak dan amal umat Islam kepada Quran dan Sunnah itu hanya dapat dilakukan dengan berkembangnya semula roh iktihad di kalangan ulama. Pengertian ini harus dibantah oleh ahli-ahli taklid, tetapi walaubagaimanapun amat sukar untuk

menolak kebenaran apa yang dikatakan oleh Tuan Mohammad Natsir itu. Mudah-mudahan alim ulama akan mendalami hal-hal yang tersebut ini.

Kiyai Fatahullah Harun, seorang ahli Nahdlatul Ulama', di dalam syarahannya telah mengatakan, bahawa “sebelum penjajahan dahulu di Indonesia tidak ada sekolah-sekolah dancing, tetapi sekarang sekolah-sekolah itu sudah banyak dan merebak di mana-mana, juga banyak pemuda-pemuda yang bakal dan bercadang keluar negeri belajar memegang gelas ber-toast-toast-an dan belajar pula minum isinya supaya nanti jangan canggung di dunia internasional- sekalipun berlawanan dengan agama, galak dikerjakan terutamanya bagi mereka yang berada di luar negeri.” Kenyataan yang diberi oleh Kiyai ini adalah sebagai suatu tampanan kepada kenyataan yang diberi oleh Datuk Muhammad Yusuf yang baru pulang dari Indonesia, yang mengatakan bahawa di Indonesia tidak ada dansa dansi dan ini satu keterangan pula yang perlu diperhatikan oleh kita- mengapa kita selalu melihat di dalam jabatan-jabatan luar Indonesia, di dalam perayaan-perayaan, botol-botol berlaga dan ahli-ahli jabatan itu kerap pula melaga-lagakan gelas di antara satu dengan lain dan khabarnya, berdansa dansi pula. Kita hanya menyampaikan sahaja jangan pula nanti pihak konsul salah faham, lalu main marah-marah. Sepatutnya supaya berita itu jangan keluar, kalau ada satu-satu Kiyai datang pihak konsul perlu menasihatinya dahulu.

A. Khir Johari, Menteri Muda Perdagangan dan Perusahaan Persekutuan Tanah Melayu, dalam suatu ucapannya menyeru orang-orang Melayu supaya bersemangat baharu di dalam perniagaan dan menghendaki supaya mereka sanggup menghadapi kesusahan, sabar dan berasa sompong atas usaha dan tenaga sendiri, mengatakan bahawa "kejatuhan orang-orang melayu dalam lapangan ekonomi ialah disebabkan oleh penajah."

Sombong di dalam sesuatu perkara itu tidak digemari oleh agama-kerana itu janganlah tiap-tiap seorang bersifat sompong- ia mestilah bersyukur kepada Tuhan kalau usahanya bagus dan berjaya-bukan menyombong.

Selain dari itu, sebab-sebab kejatuhan kita janganlah pula hendaknya dibalakan kepada orang lain tetapi carilah salahnya pada kita sendiri kerana hingga sekarang ini peluang-peluang banyak telah diberi namun usaha sendiri makin berkurang- dan sebab itulah, kerana kurang usaha dan kemahuan, kita selalu hendak disuapkan sahaja. Menurut sebahagian orang sebab-sebab yang utama sememangnya ada di dalam diri masing-masing iaitu orang-orang kita kurang bersungguh-sungguh dan apabila lapang sedikit kurang berusaha.

Ustaz Zulkifli Muhammad di dalam syarahannya kepada kadi-kadi di dalam kursus di Kolej Islam dikatakan berkata bahawa menurut hukum Islam "Seseorang isteri tidak mesti dan tidak boleh dipaksa memasak dan membuat kerja rumah. Tetapi kalau isteri dengan rela membuat kerja-kerja tersebut tidaklah menjadi apa-apa kesalahan". Betul ustaz! Tetapi ustaz mesti ingat ertiinya bersuami isteri itu ialah permasyarakatan hidup yang mesti berhulur tarik dan berkurang berlebih. Sebab itu anjuran menentukan hukum itu

jangan disebut hanya sebelah pihak sahaja maka patut pula disebut bagaimana pula kewajipan isteri yang tidak memasak itu terhadap kewajipannya kepada isterinya. Dengan cara memberi keterangan serupa ini baharu tidak berat sebelah ustaz!

Tuan Mokhtar Lubis, pengarang dan pemimpin umum "Harian Rakyat" yang telah membongkar rahsia makan suap Roslan Abdul Ghani, Menteri Luar Indonesia (P.N.I.) telah ditangkap dengan kuatkuasa tentera dengan alas an menyokong gerak-gerak Colonel Zulkifli Lubis yang telah menghilangkan diri itu. Persatuan wartawan dunia telah membantah dan kerana bantahan itu ia ditahan di rumahnya. Melihat kritik-kritiknya yang tepat, pedas dan beralasan maka teranglah sudah bahawa di Indonesia itu tidak boleh diadakan kritik terutamanya kalau mengenai golongan sendiri! Adakah sifat-sifat ini merata? Jawapannya tentu! Kerana mana-mana orang yang tidak sukakan pancasila seperti orang-orang Masyumi mudah dan kerap kali sahaja ditangkap kerana kononnya mereka orang-orang "*Dār al-Islām*". Kalau ada wartawan-wartawan luar negeri yang selalu menulis atau mengkritik kerajaan Indonesia sudah tentu tuduhannya lebih lagi dan tentunya orang itu akan diharamkan masuk ke Indonesia. Kalau dikatakan negeri diktator mereka marah- berat ke merah marah tetapi sudah terang coraknya itu hijau- kalau tidak percaya selidik sendiri.

Sedikit masa yang lalu UMNO Singapura telah mengadakan peraduan misi kacamata. Di dalam peraduan itu tentunya yang mengambil bahagian ialah wanita-wanita. Dan sekarang timbul pula ura-ura, entah jadi entah tidak, UMNO Singapura akan mengadakan satu peraduan

untuk memilih "Ratu Merdeka". Ini tentunya tidaklah menjadi apa-apa, sebab UMNO adalah satu parti yang bersifat kebangsaan. dan apa jua yang dibawa bangsa tidaklah menjadi satu perkara yang akan merosakkan kedudukannya sebagai Parti Kebangsaan- hanya sanya perkara yang menyediakan bagaimana dan apa yang hendak dikatakan oleh pegawai-pegawai agama UMNO: Adakah mereka sudah menfatwakan yang demikian itu perlu dibuat atau adakah semata-mata jabatan agama itu hanya sebagai umpan pancing untuk memancing umat bahawa dasar perjuangan UMNO ialah menegakkan Islam? Mudah-mudahan pegawai-pegawai agama itu sendiri dapat mentafsirkan segala kejadian-kejadian ataupun perbuatan-perbuatan yang menentang agama yang dilakukan di dalam usaha-usaha UMNO sama ada di dalam fun fairnya atau seumpamanya.

Menurut berita yang disiarkan oleh harian "Merdeka", mengatakan bahawa Presiden Sukarno telah menetapkan satu rancangan supaya dibentuk suatu "Dewan Revolutioner" yang akan menjadi suatu badan penasihat baginya untuk melaksanakan pemerintahan diktator di dalam negaranya Indonesia. Kalau benar berita itu, ertinya, dewan perwakilan rakyat yang ahli-ahlinya dipilih di dalam pemilihan umum dahulu tidak lagi diterima suaranya atau keputusannya- yang memutuskan segala sesuatu hanya Presiden Sukarno sahaja. Ada sebahagian orang bertanya: Apakah Sukarno akan dapat menegakkan kediktatorannya di Indonesia itu? Jawab: yang didapat daripada kejadian-kejadian yang telah berlaku bahawa sesuatu pemerintahan diktator itu dapat dilaksanakan dengan ada kekuatan tentera berdiri dibelakangnya sedang keadaan-keadaan tentera di Indonesia pada masa ini selain daripada pecah belah adalah lemah pula kerana daripada punca-punca rasmi menyatakan bahawa tentera-tentera Indonesia jangankan untuk menghadapi

keributan di seluruh Indonesia sedangkan untuk menghadapi *Dār al-Islām* di Sulawesi sudah pun mengakui kelemahan dan ketewasannya.

Keputusan menjadi diktator daripada Presiden Indonesia itu besar ertinya kepada umat Islam Indonesia kerana mereka itu adalah menjadi musuh yang besar kepada Presiden Sukarno. Ini terbukti daripada ucapan-ucapannya yang selalu mencari umat Islam untuk menegakkan negara Islam sehingga pernah dikatakan tatkala bercakap di hadapan polis dan tentera bahawa "Sesiapa yang cuba hendak mengubah dasar pancasila hendaklah dilarang dan ditentang dengan kekerasan". Dengan kata-kata itu dan berita-berita yang tersiar maka umat Islam Indonesia wajib memerhatikan, terutamanya orang-orang Masyumi, apakah nanti Presiden Sukarno akan "meng-Ikhwan al-Muslimin-kan" ahli-ahli Masyumi, iaitu sebagai lawan politik dengan menghukum atau memancung syuhada-syuhada Islam di Indonesia seperti yang berlaku di Mesir dahulu? Rakyat-rakyatnya pada masa yang telah lalu memang ada di dalam mana beberapa banyak anggota-anggota Masyumi yang ditangkap kemudian dikurung bertahun-tahun kerana dituduh bekerja sama dengan pemberontak-pemberontak *Dār al-Islām* sama ada di Jawa Barat, di Sulawesi dan di Aceh. Ini adalah suatu peringatan kepada umat Islam dan patut pula menjadi peringatan kepada anggota-anggota Nahḍatul Ulama' supaya berhati-hati menyokong suatu pemerintahan yang harus nanti mengorbankan saudara-saudaranya umat Islam kerana cita-cita kebangsaan. Jika pemimpin-pemimpin Nahḍatul Ulama' tidak beringat-ingat dari sekarang dan tidak berhati-hati maka jagalah bahawa mereka akan ditanya Tuhan nanti tentang tanggungjawab dan kewajipan terhadap cita-cita menegakkan negara Islam di Indonesia.